

【本文翻刻】

(太字の部分は現在剥落しています。)

鴻池山中氏之富以釀興也慶長五年至今殆二百載而釀不廢焉其祖曰幸元蓋鹿之介幸盛氏之孫云肇造双白澄酒而大售其伝送関以東初也步担次以馬馱其旁邑池田伊丹一帶及灘西宮等以釀著名者亡慮數百家矣皆倣慕而起者今南海之帆陸統東嚮而馳者莫不酒之載也宅後有大池曰鴻池是邑所以得名而浪華諸宗人又用為鋪号也始釀之歲舍後祀稻荷以鎮宅及業日興乃以為神之福祐也益処禱祀幸元諸子分居浪華者三家厥初亦皆以釀興皆小宗也其支派又九家而僕隸起家者不与焉今夫浪華鴻池氏之富甲于天下亦能知敬宗無失礼也宝曆癸未之秋大風祠旁松折庄壞祠不改作者二十載於是諸宗人相与謀曰祖之德弗忘也神之祐其可遺乎奉請新祠以綏後祿其費雖微一人承事其余為忘祖乎請釀金命工咸曰善天明甲辰祠成復旧觀而有加焉石表石燈翼如也乃相与約曰後年祠有頽圯者亦必以斯從事母使大宗独任也又曰盍紀諸石乎今之大宗子名元長実為幸元七世孫其子元漸從余受業是歲仲秋余偶遊北山訪其居主人觴我于池上奉家牒而請焉余既甘其酒而嘉其語也遂叙而銘之

忠武震世者其角嶽々聖賢富家者其業奕々天不絶善人後神豈苟降多福

不然天下多富民孰如山中氏子孫繩々芬華赫々者